

# Qalam

Bilangan 54 Jamadil Awal 1374 – Januari 1955 – 60 Sen

## Kemalangan Bah

Mulai dari awal mengikut bulan Disember yang lalu banyak tempat di seluruh Tanah Melayu termasuk beberapa tempat di Singapura, telah ditimpa kemalangan bah yang belum pernah terjadi seumpamanya semenjak daripada tahun 1882. Kemalangan bah ini telah membawa penderitaan yang sebegini hebat di dalam mana berpuluhan-puluhan ribu orang telah dipindahkan daripada rumahnya yang telah digenangi oleh air yang mencurah-curah itu sehingga telah merosak segala tanaman-tanaman dan membinasakan hidupan-hidupan (binatang ternak) penduduk-penduduk yang ditimpa kemalangan itu.

Kesan sudah tentu adalah membawa penderitaan kepada orang-orang yang malang, penderitaan mana bukannya sahaja di dalam masa bah tetapi juga seudahnya kerana banyak daripada mata pencarian mereka terputus dengan sebab kebinasaan yang terjadi itu.

Kawasan bah yang buruk sekali ialah di kawasan Pahang dan Terengganu dalam mana keadaan itu cukup merbahaya dan membawa kerugian yang besar kepada penduduk-penduduk seluruhnya. Bahaya bah yang besar ini belum pernah dirasa dan yang demikian adalah suatu kemalangan luar biasa yang ditimpakan ke atas umat di Malaya ini dan bagi kita umat Islam yang termalang, untuk menahan pukulan duka nestapa hendaklah ingat akan firman Tuhan yang maksudnya: apabila datang kemalangan-kemalangan (maksiat) atas mereka, maka mereka berkata

“adalah kami kepunyaan Allah dan kami kembali kepadanya”.

Di sebalik itu janganlah kita berputus harap atas pertolongannya sambil berikhtiar sedaya upaya untuk melepaskan kemalangan itu di dalam mana segala usaha-usaha kita itu kejayaan kita serahkan kepada kekuasaan dan sifatlah yang demikian itu sebagai cubaan hidup bagi diri kita untuk mengukur kekuatan dan keyakinan kita kepada kekuasaannya.

Di dalam pada itu kita wajib mengucapkan syukur kepada Allah Subḥānahu wa Ta‘ālā bahawa dengan terbitnya kemalangan itu berduyun-duyun pula hamba Allah yang lain menghulurkan derma bantuannya untuk menyurangkan bebanan dan tanggungan yang telah menimpa diri orang-orang yang malang itu dengan mencurah-curah bukannya sahaja dengan wang ringgit tetapi juga dengan tenaga dan titik peluh dengan menghadapi hujan-hujan yang lebat itu siang dan malam tidak putus-putusnya.

Juga patut kita bersyukur kerana kerajaan pun besama-sama dengan orang ramai memikul penderitaan-penderitaan yang telah menimpa kita dan dalam masa yang demikian ini, yakni dalam masa menumpukan segala kebolehan untuk membantu orang-orang yang kena kemalangan itu, mustahak sangat menjauhkan tempelak dan tuduh menuduh kerana yang demikian itu tidak ada faedahnya. Yang berfaedah hendaklah kita menggambarkan segala kejadian itu dengan memberi suatu cara bagaimana kita kelak mengelakkan supaya jangan berlaku lagi kemalangan yang serupa itu yakni mencangakan sesuatu ikhtiar untuk menjauhkan sesuatu kemalangan. Sedang kalau kemalangan mahu tiba tidak ada bumi tempat kita hendak lari daripadanya seperti kata pepatah – “Halang tak dapat ditolak untuk tak dapat diraih”.